



Gabinete Wever - Croes II

# ISLA NLINE

Diabierna 25 Maart 2022

Email: [IslaOnline@gobierno.aw](mailto:IslaOnline@gobierno.aw) Tel: 528-4952


## NOTICIA DI GOBIERNO



20  
22


AÑA DI  
INVERSION Y  
OPORTUNIDAD





## Premier Wever – Croes a atende evento Blue Pacific/ Caribbean CSW High-Level Event

# COMO ISLANAN CHIKITO TA NECESARIO PA TRAHA HUNTO PA CREA ISLANAN MAS RESILIENTE Y SOSTENIBEL



Prome Minister Evelyn Wever – Croes a forma parti di e di 66 sesion di Blue Pacific/ Caribbean CSW High-Level Event “Pacific and Caribbean Women Leaders Championing Ocean Climate Nexus”. Diferente di islanan a forma parti di e evento aki y a trata entre otro e rol di hende muhe den e situacion di cambio di clima. Prome Minister di Aruba a elabora riba e rol importante di lidernan di estado di islanan chikito den desaroyo / Small Island Developing States (SIDS) y esfuersonan cu Aruba a realisa pa mehora posicion di e ser femenino.

Premier Wever - Croes a inicia elaborando riba e consecuencianan y riesgonan devastador cu cambio di clima tin riba islanan. Pa locual ta Aruba, e riesgonan ta inclui erosion di costanan, dañonan na coral y cambio di tempo cu ta conoce na Aruba. Esakinan ta afecta e comunidad Arubano incluyendo

e industria turistico cual Aruba ta depende riba dje.

E forma con cambio di clima ta afecta hende muhe desproporcionalmente a keda accentua durante di e di 66 sesion di e CSW. Manera cu e situacion ta aworaki, mester reconoce cu hende muhe ainda ta na desbentaha. Y e avansenan cu a logra poco poco den direccion di igualdad, a wordo hala atras a consecuencia di e pandemia di Covid.

Premier Wever – Croes a sigui bisa, cu como lider femenino di SIDS, e ta sumamente importante pa sinta na mesa, expresa opinionnan y cu esakinan wordo tuma na cuenta. Considerando cu hende muhe ta e grupo cu tin mas conocimiento di ki necesidad hende muhe y muchanan tin.



**Continuacion COMO ISLANAN CHIKITO TA NECESARIO PA TRAHA HUNTO....**




mihor sostenibilidad economico pa hende muhe y mehora nos sociedadnan. Mester reconoce cu e sector tecnologico ta domina pa hende homber, mientras cu esey ta e futuro di empleo.”Gobierno di Aruba a tuma accionnan concreto pa adresa e aspecto aki y prepara e generacion hoben pa mercado laboral di futuro, combina cu esfuersonan pa sigura participacion di hende muhe den areanan di STEM.

A haci esaki a traves di Universidad di Aruba cu introduccion di e facultad: Sustainable Island Solutions Through Science, Technology, Engineering and Mathematics (SISTEM). E facultad tin e programanan di Bachelor, Master y PhD y e team enarga cu e facultad ta consisti di mas hende muhe. Ademas mira aumento di participacion di studiantenan femenino tambe. Prome Minister a sigui expresa cu a tuma pasonan structural pa aumenta standard di bida y empodera hende muhe y mucha muhe. Cu ayudo di “UNWomen office for the Caribbean”, a completa e prome “gender policy” pa Aruba, enfocando riba areanan strategico.

‘Nos mester sigura cu nos ta forma parti di e solucionnan den asuntonan di clima y igualdad di genero’. A pesar cu contribucion di e ser femenino den temanan di cambio di clima na e momentonan aki no ta hopi, mester demostra cu hende muhe por tin solucionnan. Pasobra nos hende muhenan y muchanan no por continua den e situacion di ta esunnan mas afecta, sin cu nan interes ta wordo scucha, Prome Minister a enfatisa.

“Como islanan chikito nos mester sostiene otro y traha hunto riba solucionnan necesario, pa crea resiliencia den contexto di retonan structural, obstaculonan y recuperacion.” Prome Minister Wever – Croes a termina gradiciendo e organisacion pa participacion y a enfatisa riba e parti di importanica pa uni forsa pa tuma accion coordina pa e islanan ta mas inclusivo y resiliente contra cambio di clima, pasobra solamente hunto por haci un cambio.

“Nos ta di opinion cu si ekipa hende muhe cu e “right skills”, door di percura cu ta trece mehoracion den accesibilidad di educacion halto y trabounan sostenibel. E lo yuda pa crea







## Declaracion di Minister Ursell Arends:

# ARUBA A CUMINSA APLICA SANCCIONNAN

Mi encargo como minister di transporte ta inclui luchtvaart y mi ta ser manteni na altura diariamente door di Directie Luchtvaart di e efectonan cu e agresion militar di Rusia contra di Ukraina tin pa Aruba.

Manera ta conoci, varios pais - entre otro Merca, Reino Unido y Union Europeo - a emiti sancctionnan en conexion cu e situacion aki. E sancctionnan aki ta regarda diferente area; financiero, maritimo, diplomatico pero tambe pa loke ta aviacion. Na Aruba, mescos cu otro paisnan, ta evaluando e aplicabilidad di cada sancction y ta integrando esaki den nos leyman. Esaki a base di e sancctionnan di Union Europeo, cu Aruba ta siguiendo.

A base di esaki a tuma e paso pa cera espacio aereo pa tur avion cu ta propiedad di of cu ta wordo dirigi pa un persona of compania Ruso.

Ademas di esey, Directie Luchtvaart a cuminsa tambe cu implementacion di e sancctionnan y a cuminsa aplica esaki riba



un total di 7 avion. Esaki ta encera de-registro of grounding di e avion, dependiendo di e sancction.

Comunidad di Aruba por ta sigur cu hunto cu Directie Luchtvaart mi lo sigui monitorea e sancctionnan di cerca. E sancctionnan ta wordo adapta regularmente, y nos lo percura pa Aruba aplica esakinan debidamente.





# Trash 2 Cash su Pitch & Switch Event: UN PASO PA MANEHO DURADERO DI DESPERDICIO

Durante un mainta yena cu informacion na Renaissance Convention Center, un grupo di participante a presenta nan plannan ambicioso durante e Pitch & Switch Event di Trash 2 Cash. Un proyecto unda cu 22 di Februari, 2022 ultimo Ministerio di Transporte, Integridad, Naturalesa y Asuntonan di Adulto Mayor a anuncia.

Dilanti un grupo di panelista diverso, un total di 24 pitch a ser presenta, den cual a elabora no solamente riba kico nan idea ta, pero tambe e cooperacion cu lo tin mester for di gobierno pa logra recicla, re-usa y reduci diferente "waste streams", of tipo di desperdicio.

Inicialmente a ricibi 34 pitch, di cual 31 a ser selecta pa e presenta na e Pitch & Switch event, di cual 24 compania/persona a presenta nan idea na un panel di experticio diverso. Cu esaki gobierno ta tuma e siguiente paso pa asina hunto cu gremionan comercial y stakeholders - manera e participantenan - yega na un solucion duradero pa cu nos problema di desperdicio aki na Aruba.

Pa reenforza legislacion, mester crea e fundeshi solido den comunidad caminda tin infraestructura y legislacion na vigor pa asina redirigi diferente tipo di desperdicio pa ser procesa door di tur e diferente organisacionnan involvi.

Importante ta pa menciona cu Trash 2 Cash no ta compromete gobierno na ningun compromiso financiero, y e rol di Gobierno den esaki ta di facilitador y esun responsabel pa medio di ley establece e normanan, condicionnan y criterianan. Asina aki Minister Ursell Arends kier traha conhunto pa soluciona e problema di desperdicio, y finalmente pone un fin na e dump di Parkietenbos.

Gobierno tin como meta pa catalisa actividadnan di reciclahe y economia circular mas pronto posibel, y mester henter comunidad su colaboracion pa tuma e pasonan necesario. Siguietemente e panelista y organisadornan di e evento aki lo pasa riba tur datos colecta pa asina conduci un analysis pa Minister Arends pa asina progresa na e proximo pasonan pa fortifica e propuestanan haci.

Keda altanto di esaki door di bishita e [website www.trashtocasharuba.org](http://www.trashtocasharuba.org) of like e pagina di Trash to Cash Aruba riba red nan social.







## Riba Dia di Himno y Bandera Minister di Cultura Xiomara Maduro a bishita: **EXPOSICION DI POTRETNAN DI "ARUBA, DEN MASHIN DI TEMPO"**

Riba dia di Himno y Bandera, Minister di Cultura a bishita e exposicion di Archivo Nacional Aruba, "Aruba, den mashin di tempo", caminda por a aprecia potretnan di Aruba di antes y awo.

Ta trata aki di un exposicion cu Archivo Nacional Aruba conhuntamente cu Fundacion Amigonan di Archivo a prepara en conexion cu Dia di Himno y Bandera. Cu e exposicion aki ta muestra pa medio di potretnan e Aruba di antes y e Aruba di awor, por mira e sitio of edificio su ubicacion den pasado y actual, asina por tuma nota di e desaroyo durante añanan cu a pasa. E potretnan ta saca pa diferente fotografo, local y di exterior manera e.o. Jan Geurts, dhr. Hochstul, de Graaff y Clyde Harms.

E exposicion lo keda habri pa e proximo lunanan y por wordo bishita durante oranan di trabao. Minister Xiomara Maduro ta gradici Archivo Nacional Aruba y voluntarionan pa e exposicion, masha danki pa conserva y expone e potretnan historico nan aki.





# Relaciona cu Celebracion Dia di Himno y Bandera 2022: MINISTER DI CULTURA XIOMARA MADURO A BISHITA ARUBA ADVENTIST ACADEMY

Siman pasa Minister di Cultura a bishita Aruba Adventist Academy den cuadro di celebracion di Dia di Himno y Bandera. Na su yegada e mandatario a wordo ricibi pa e alumno- y docentenan di e scol. E mandatario a pasa bishita e klas y aki e alumnonan a comparti cu e Minister nan obranan traha en conexion cu Dia di Himno y Bandera, ademas e alumnonan a comparti nan conocimiento, stimacion y aprecio pa nos pais Aruba. Mayoria di e alumnonan no a nace na Aruba pero a bin biba na Aruba hunto cu nan mayornan cu ta labora na nos pais. Ta di admira e conocimiento cu e alumnonan tin di nos pais su simbolonan nacional, custumber y cumindanan crioyo.

Minister di Cultura Xiomara Maduro a gradici y a comparti cu e alumnonan, expresando un frase na e alumnonan cu nos Libertador G.F. Betico Croes a usa na diferente ocasion: "Arubiano no ta solamente esnan cu nace na nos Pais Aruba, pero arubiano ta tambe esnan cu ta stima y tin Aruba den nan mente y curazon". Mustrandocu nos pais ta forma pa diferente persona di diferente nacionalidad cu a bin establece na Aruba y ta biba den union y ta traha y contribui na progreso di nos pais. E staf y alumnonan a keda masha encanta cu e bishita di minister di Cultura y a obsekia e mandatario un regalo.





# Riba Dia di Himno y Bandera: MINISTER DI CULTURA XIOMARA MADURO A BISHITA EXPOSICION RIKESA DI NOS LAMA DI SRA. LOURDES KROZENDIJK

Riba Dia di Himno y Bandera minister Xiomara Maduro a pasa bishita señora Lourdes Krozendijk na Wayaca pa admira su coleccion impresionante di cocoloshi. Un coleccion di variacion di cocoloshi den forma, unico, straño y den diferente color y grandura y hopi mas di bida den lama. Minister Maduro ta gradici Sra. Krozendijk pa e exposicion y e tempo pa splica e mandatario riba su coleccion, cual ta uno cu a inicia mas di 25 aña pasa.





# KLOOSTER DI IMELDAHOF TABATA BON BISHITA PA CELEBRACION DI HIMNO Y BANDERA

Diabierna mainta prome cu 9or caba e prome bishtantenan a yega na e klooster di Imeldahof, pa asina nan habri nan dia di celebracion di Himno y Bandera. Mas hende a sigui yega henter e dia, te laat den atardi.

Bishitant nan a pasa wak e 2 exposicionan esta "Caribbean Ties" di MANA y 'Historia di parokia di Noord'. Hopi a pasa admira e bunita kapel y tambe savoria di dushi snacksbox, cos dushi y cuminda crioyo. Tur esaki a forma un dushi ambiente familiar na e convento.

Fundacion Kapel di Bethania ta masha agradeci na e acohida di e pueblo di Aruba pa a pasa bishita Klooster Imeldahof riba nos dia nacional. Alavez kier a gradici na tur e voluntarionan cu di un of otro manera a coopera y yuda prome, durante y despues di e evento. Naturalmente un danki na tur esnan cu a haci donation pa asina hasi e actividad un exito.

Fundacion Kapel di Bethania ta recorda tur hende cu lo tin gana di pasa bishita Klooster pa e 2 exposicionnan of pa bishita e Kapel cu lo ta habri, dialuna, diaranson y diahuebs for di 9 am te cu 3 pm.

Si ta desea di hasi un donacion na nos Fundacion Kapel di Bethania, lo ta posibel pa deposita riba nos cuenta di Banco na Aruba Bank number di cuenta : 6021690190. Di antemano ta gradici pa e gesto aki y asina yuda nos pa preserva y cuida e exposicion di "Historia di Parokia di Noord".







## A REUNI CU ATA, DOW Y DIP RIBA PROYECTONAN BABY BEACH Y RODGERS BEACH



Diahuebs Minister di Turismo y Salud Publico Sr. Dangui Oduber a reuni cu ATA, DOW y DIP caminda a papia riba e proyectonan di Baby Beach y Rodgers Beach cu ta parti di e master plan cu tin pa Sero Colorado. E proyectonan aki ta bay eleva henter e area rond di e dos playanan aki teniendo na cuenta cu nos naturalesa creando asina un desaroyo di embeyesimento di e area na un manera sostenibel.

E proyecto di Baby Beach fase 1 ya caba a keda entrega aña pasa y awor ta bezig cu e segundo fase di e proyecto aki. Otro proyecto cu ta finalisando fin di april ta e proyecto di renobacion di e trapi na Rodgers Beach. E trapi aki ta un punto di acceso hopi importante pa Rodgers Beach mirando tur e cambionan cu henter e area aki lo bay conoce ora cu e proyecto keda finalisa.

Rodgers Beach lo bay haya un area di parkeo completamente nobo mescos ta e caso pa Baby Beach tambe. Tur dos area lo bay haya facilidadnan caminda hende por bay cumpra cuminda y/of bebida y tambe lo tin bañonan publico pa tur bishitante. Ta bay bin facilidadnan caminda por practica "beach sport" manera beach tennis y beach volleyball.

Minister Oduber a crea un comision di proyecto infrastructural di turismo cu ta keda lidera pa Ministerio di Turismo. E comision



aki lo bay traha mas di serca cu DIP pa asina e maneho cu a keda crea pa cu e beach nan wordo implementa. E desaroyo aki ta uno sostenibel. Pesey a dicidi tambe cu den e proyecto aki lo bay planta hopi palma di coco pa crea sombra pa asina limita e contruccion di palapa ariba e beach.

Turismo ta e driver di nos economia y pesei su desaroyo ta keda un prioridad. E gobierno aki ta para pa turismo di calidad, e turista cu ta bin pa gasta placa y contribui na nos economia. Pesey ta hopi importante pa sigui inverti den e producto Aruba. E proyectonan aki ta bay trece mas actividad pa San Nicolas pa asina percura cu e turista ta bin San Nicolas pa crea mas actividadnan economico. E Minister a termina bisando cu "Keda sin haci nada pa San Nicolas NO ta un opcion mas. San Nicolas tin tur e potencial pa haya su fair share den e desaroyo di nos pais". Den proximo simanan lo ta preparando e destaho publico pa Fase 2 di e proyecto di Baby Beach.



Continuacion A REUNI CU ATA, DOW Y DIP RIBA PROYECTONAN....



# Masterplan SEROE COLORADO Rodgers beach

SCALE: 1:8





# MINISTER ENDY CROES A REUNI CU MINISTER SITHREE VAN HEYDOORN DI CURAÇAO

Recientemente e Mandatario di Enseñansa y Deporte di Aruba a reuni cu Minister di Enseñansa, Ciencia, Cultura y Deporte di Curaçao sr. Sithree van Heydoorn. Presente ne ocasion tabata staf di Minister di Curaçao sr. Errol Bishop y sra. Irelnety Copra kende tabata na Aruba. E tabata un encuentro fructifero unda cu a intercambio ideanan positivo pa ambos isla. Un bon reunion cu Minister di Curaçao na unda cu nos ta continua y traha riba e tereno di Enseñansa y Deporte, Ciencia y Cultura pa nos islanan.



**SINTONISA**  
**CONFERENCIA DI PRENSA**  
**DI GOBIERNO DI ARUBA**

**f LIVE**  
 Gabinete Wever-Croes

**Tur dialuna y diahuebs | 10:00 am**



# MINISTER ENDY CROES A BISHITA SPO BRAZIL DEN CUADRO DI CELEBRACION DI HIMNO Y BANDERA

En conexion cu e celebracion di luna di maart y siman grandi di celebracion di nos dia di Himno y Bandera Minister Endy Croes conhuntamente cu Parlamentario Alvin Molina a bishita SPO Brazil. Durante e mainta ameno e Mandatario di Deporte a inaugura e 'all in one court' esta un cancha caminda e alumnonan por hunga entre otro; futbol, volleyball, basketball riba e speelplaats. E cancha a wordo pinta durante fin di siman di proyecto di Aruba Doet. E tabata un mainta placentero na unda e alumnonan a participa den diferente actividadnan popular cu e scol a organisa. Tambe nan tabata bende cos dushi manera entre otro 'cupcake', dulce de leche, pa asina recauda fondo pa inverti bek den e scol.

Minister Endy Croes ta sinti'e honra di por a inaugura e cancha deportivo alabes ta gradici pe invitacion y bunita recepcion. Finalisando e Mandatario di Enseñansa y Deporte ta felicita e docentenan y alumnonan pa un celebracion asina bunita y deportivo.





# MINISTER DI DEPORTE PRESENERE NA XTREME MUAY THAI MMA GLOVES 4 OZ

Minister Endy Croes a bishita e competencia di Xtreme Muay Thai MMA Gloves 4 OZ cu a tuma luga na Centro di Bario Noord. Despues di dos aña e fanaticada por a disfruta atrobe di un tremendo competencia cu participacion di atletanan di tanto di Aruba como tambe Curaçao, Merca y Sint Maarten. Un bunita evento bon bishita. Finalisando e Mandatario a hiba palabra y ta felicita e organisadonan, atletanan como tambe e refereenan.



# MINISTER DI DEPORTE A CERA CONOCI CU E 'DRIFT PRINCESS' DI BONEIRO SABELLE SARAGOZA

Siman pasa Minister Endy Croes a ricibi bishita di cortesia pa cera conoci cu Sabelle 'Sabi' Saragoza miho conoci como e 'Bonaire Drift Princess'. Sabi tabata na Aruba en conexion cu nos dia nacional unda cu a participa ne evento 'King of the Ring 2022' cu a tuma luga fin di siman pasa na International Raceway Park Palo Marga. Presente na e encuentro ameno aki tabata sra. Ilse Felida y sr. Wimpy Saragoza kende nan ta mama y tata di Sabi. Como embahadora di Boneiro, Sabi a regala Minister Endy Croes un detaye di TCB ku articulonan di Boneiro y e Mandatario a obsekia un detaye como muestra di aprecio y gratitud.

Minister Endy Croes ta felicita Sabi pa su curashi y determinacion como hoben alabes mucha muhe cu ta practica e deporte di 'drifting'. Alabes ta gradici e mayornan cu ta duna nan yiu e sosten pa nan por ehrece cu amor y pasion e deporte di 'drifting'.





# DEPARTAMENTO DI SALUD PUBLICO TA ALERTA RIBA ANDANZA CU TA CAUSA MALESTAR GASTROINTESTINAL

Departamento di Salud Publico - DVG pa medio di e relato aki kier alerta comunidad cu ta circulando informacion riba posibel aumento di casonan di diarea compaña pa sacamento y/of sintomanan di griep.

Departamento di Salubridad Publico no tin registro of melding di e situacion aki y ta asumi cu su comportacion ta leve, autolimita y cu ta wordo maneha ambulatoriamente pa esnan cu ta afecta.

Mester tene na cuenta cu diarea agudo of Gastroenteritis por tin complicacion pa cierto tipo di persona, manera mucha bou 5 aña, adultonan mayor y/of esnan cu tin un condicion di salud.

Ta recomendabel, si un persona of grupo di persona ta haya sintomanan di Gastroenteritis (specialmente personanan cu tin un condicion di salud) consulta cu dokter. Na su lugá, e dokter concerni lo manda un registro/melding pa DVG; pa asina nos Departamento, por monitor e malesa aki y informa debidamente sector medico pa tuma medidadnan di diagnostico, tratamiento, como tambe informa comunidad debidamente pa prevencion.

Malestar gastrointestinal ta wordo ocasiona entre otro pa un of mas micro-organismo manera virus, bacteria of parasito, sea directamente of indirectamente via nan toxinan. Transmision di micro-organismonan ta sosode door di e mannan y/of consumo di bebida of cuminda contamina. Tambe transmision por sosode na momento cu un dunado di cuida cambiando un pampers of haciendo limpi un saca, tampoco ta laba su man suficientemente bon cu awa y habon. Di e forma aki e persona afecta despues di bay wc of e dunado di cuida ta transferi e micro-organismo pa un otro superficie caminda cualkier otro persona ta pasa piki esaki y pa via di nos boca e micro-organismo ta drenta un otro persona su sistema.

Na momento cu e micro-organismo drenta nos sistema e ta ocasiona dolor di barica, keintura, diarea y sacamento. Den casonan extremo of cerca mucha, e persona por hasta deshidrata debi na cantidad grandi di likido cu e ta perde door di keintura, sacamento y diarea.

Pa evita transmision di malesa gastro-intestinal ta importante pa pone extra atencion na nos higiena di man. Labamento di man cu awa y habon prome cu come, despues di bay wc y durante cualkier ora di dia, ta yuda minimalisa e riesgo pa haya



malestar intestinal pero tambe diferente otro malesanan manera entre otro Influenza, COVID y otro.

Na momento cu un persona tin diarea cu of sin sacamento ta importante pa:

- Evita di bay trabou of di hiba un mucha malo scol of kresh.
- Vigila e persona bon pa evita deshidratacion, specialmente mucha y hende grandi. Percura pa e persona/mucha bebe hopi likido, por ehempel awa, juice di apple, buyon di sopi, pedialite y mas. Si e persona no tin apetit pa come ta ok pero ta importante pa e bebe hopi likido.
- Vigila e persona su temperatura di curpa, si esaki subi riba 38°C, consulta cu dokter di cas riba cua medicamento lo ta miho pa uza.

Pa mas informacion, like nos Facebook page Directie Volksgezondheid DVG Aruba, subi nos website [www.dvg.aw](http://www.dvg.aw) of yama nos na 5224200.





## Conseho di Minister di Reino

# ARUBA TA REFINANCIA E DEBE DI 915 MIYON PA 18 LUNA MAS SIN INTERES, PERO NO TA HAYA SOSTEN DI LIKIDES PA E KWARTAAL AKI AINDA

Den reunion di Conseho di Minister di Reino awe mainta nos a haya bon noticia y menos bon noticia. E bon noticia ta cu Aruba ta haya refinancia e debe cu Hulanda. E debe di e sumanan cu nos a ricibi di sosten di likides di 915 miyon florin den 7 diferente tranche desde aña 2020, no mester wordo paga bek pa 18 luna mas y sin interes. Y esaki ta brinda estabilidad financiero pa Aruba.

E noticia menos bon ta cu Aruba no ta ricibi sosten di likides pa e kwartaal aki ya cu Conseho di Minister di Reino, riba conseho di CAFT, ta haya cu nos mester baha mas gasto den e presupuesto 2022, entre otro, mester corta mas den gastonan di cuida medico di AZV, mester corta mas den salario y no paga e 12.6% e aña aki, y mester hisa loonbelasting. E presupuesto di 2022 lo wordo trata otro siman den Parlamento, y despues lo sigui e deliberacionnan cu Hulanda. Mientrastanto, e hecho cu no a ricibi sosten di likides ainda, ta pone presion riba e situacion financiero di nos pais, pero mescos cu otro kwartaal nan Aruba lo sa di cumpli cu pago di gasto y di debe.



E noticia cu tanto Standard & Poors y Fitch a mantene nos rating, y cu a refinancia e debe di 915 miyon, cu 18 luna sin interes, ta duna un perspectiva cu poco poco nos ta yegando den normalidad.

# AGENDA BRA

UNIDAD MOBIL





**MAR. 28 - APR. 1**  
Dialuna pa Diabierna

**Parkinglot  
Centro di Bario  
Lago Heights**

8:00 am pa 12:00 pm  
1:00 pm pa 4:00 pm



For di maart 28 te cu april 1, e Unidad Mobil di Vacunacion BRA lo ta staciona na e parkinglot di Centro di Bario Lago Heights.

Na e Unidad Mobil aki, nos ciudadanonan -cuminsando for di 12 aña- por ricibi nan prome of di dos dosis, y ciudadanonan -cuminsando for di 18 aña- nan prome, di dos of e boostershot.

E vacuna disponibel riba e Unidad Mobil di BRA ta unicamente Pfizer.

Orario di atencion lo ta for di 8'or di mainta te cu 12'or di merdia y for di 1'or di atardi te cu 4'or di atardi.



# Departamento di Salud Publico: UPDATE 25 DI MAART 2022

Segun resumen semanal di awe diabierna 72 persona a recupera den e siman aki y un total di 86 caso nobo di COVID-19 a keda registra.

12 caso pa dia y un averahe di 'Positivity rate' semanal di 24% pa dia.

E cantidad di casonan activo di COVID-19 pa awe ta 54 y cantidad di fayecidonan relaciona cu COVID-19 ta 212. Datos ta ilustra casonan nobo di COVID cu un averahe semanal di

Actualmente na Aruba tin 2 persona interna cu of debi na COVID di cual den ICU no tin ningun persona y riba piso general tin 2. Na Colombia tin actualmente 2 persona den ICU y 1 riba piso general.

25/3/2022	TOTAL	RESIDENTE	NO-RESIDENTE
<b>Casonan Nobo</b>	86	49	37
Activo	54	47	7
<b>Recupera</b>	33663	29057	4606
Positivo	33929	29311	4618
<b>Morto</b>	212	207	5
Vacuna	87818	-	-
<b>Hospitalisa</b>	2	-	-
AUA			
ICU	2	-	-
AUA	COL	0	2

**HABITONAN PA KEDA**  
*Saludabel*  
DEN TEMPO DI COVID-19 Y VACUNACION

## Limita comemento di 'junk food'

Come menos 'junk food'. Limita mas tanto cu ta posibel tur tipo di buscuchi, mangel, cos dushi, batata hasa, chips, refresco, juicenan artificial y bebidanan cu hopi sucu. E productonan aki ta incentiva hiperactividad den e muchanan, ta debilita organismo di tur edad y ta relaciona cu aumento di peso. Pa combati COVID-19 bo mester mantene bo salud y vacuna, ya cu ta comproba cu e vacuna tin un efectividad halto pa proteha bo y evita transmision. Ban uza tur e hermentnan cu nos tin pa caba cu e virus aki na nos isla!

# Ami SI ta vacuna!

Mantene 1.5M minimo di distancia

Laba man frecuentemente

Uza tapa boca paden di tur lugar.

**VACUNA!**



20 | AÑA DI  
22 | INVERSION Y  
OPORTUNIDAD



E OPORTUNIDADNAN DI MAS GRANDI,  
TA REKERI ESFUERSONAN MAS GRANDI.  
UZA BO TEMPO PA INVENTA Y  
CREA OPORTUNIDADNAN PRODUCTIVO.  
Y MIENTRAS CU BO TA WARDA RESULTADO,  
TIN FE CU NA FINAL,  
BO ESFUERSONAN LO WORDO RECOMPENSA!

*Feliz Fin di Siman!*